



## Protocol

dalla seduta dil cussegl da vischnaunca,  
venderdis, ils 25 d'ost 2017: allas 18.30 – 22.15  
Liug: Sala Fontauna dil Center da sport e cultura

---

**Presidi:** Christoph Berger

**Actuar:** Paul Duff

**Presents:**

- |   |  |   |
|---|--|---|
| a) Cussegl                                  | Armin Berther<br>Stefan Columberg<br>Adrian Deflorin<br>Edgar Durschei<br>Mario Flepp<br>Anna Maria Genelin<br>Rita Huonder-Tenner | Wendel Jacomet<br>Admir Jasarevic<br>Christian Loretz<br>Giusep Lozza<br>Armin Manetsch<br>Helga Probst-Linder<br>Livio Zanetti |
| b) Suprastonza                              | Robert Cajacob<br>Victor Flepp   | Clemens Berther<br>Iso Mazzetta   |
| c) Perstgisas<br>Suprastonza                | Jris Lombris   |   |
| d) Canzlist                                 | Andri Hendry   |   |
| e) Cummissiun dil Center da sport e cultura |  |   |
| f) Hosps                                    | 17   |   |

## **Plaid d'avertura entras il president**

### **analisar**

Sche nus vulein esser attractivs pils turists, stuein nus analisar ils basegns dad ozildi. Quels van buca adina a prau culs agens giavischs. Denton mo aschia meina quei tier in success.

Nies Center da sport ei in zambergiem, negin concept ei vegnius tratgs atras diltut. Memia bia personas han tschintschau denteren ni han impedi in progress. Quei «flickwerk» sto haver ina fin e quei san ins far cun in concept ponderaus che dat valur persistenta.

### **planisar**

Planisau vein nus avunda, nus vein dau ora avunda raps e schabegiau ei pauc. Ils 21 d'uost 2017 eri scret ella gasetta: „Investiziuns da 58 milliuns francs per ils novs indrezs dallas pendicularas ei era previu nova infrastruttura da stad sil Mundaun"... "Per la planisaziun da quella purschida ei vegniu engaschau il biro specialisau Erlebinsplan GmbH..."

Per nies Center da sport vein nus dils medems experts in concept „CSC DISENTIS“ che va a prau culs giavischs e culs basegns dil hosp e digl indigen dad ozildi. Igl ei strusch da crer che la suprastonza less ignorar in concept che nus vegnin a financiar e ch'empermetta success. Ella less mantener il CSC actual.

Memia biaras personas buca qualificadas ein semischedadas en e la consequenza ei che nus vein oz ina situaziun nuncuntenteivla el CSC. Avon dad investir in franc, stuein nus approbar in concept che ei studegiaus atras e che sa vegnir realisaus. Per mei ei in bien concept igl εμπrem pass, avon da far empustaziuns.

Sche vus cuschineis a casa ina tscheina, encuris vus ora il menu e meis tenor quei a comprar en. Nus lessen uss alla sperta comprar ina cucumera e mirein pér suenter sche nus vegnin da far ina tscheina... quei ei tenor il meini dil president in falliu agir.

Sch'il hosp giavischa in «Schnitzel» e vus deis ad el ina salata mischedada, lu eis el buca cuntents! Il hosp va en loghens che porschan ad el il «Schnitzel». E nus vein avunda loghens en Svizra ed egl exterior che proschan schizun dus «Schnitzels».

### **realisar**

Lein nus mantener schliatas purschidas per bia cuosts sche nus vessen la pusseivladad da far attractivas e novas purschidas? Ni dat ei variantas pli favoreivlas per mantener purschidas existentas? Vein nus buca la curascha dad empruar ora enzatgei niev? Lein nus cul Center da sport zambergiar vinavon enstagl da far midadas? Bia personas han tema ch'ins less far midadas! Vus stueis haver tema sch'ei dat buca midadas! Ei drova novas ideas en nossa vischnaunca! Susteni ils basegns dils giuvens, fagei nies Center das sport pli attractivs. Ils giuvens dad oz ein ils clients da damaun!

Realisar il concept attractiv dalla "Erlebnisplan GmbH" il qual ei avon maun e currispunda als basegns dad oz, quei stuess esser la finamira da vus tuts tenor il meini dil president.

## **Informaziuns:**

Mortoris:

Annamaria Geissmann-Klöti, naschida ils 22 d'avrel 1922, morta ils 08 da zercladur 2017

Armando Comello-Schuoler, naschius ils 06-02-1946, morts ils 12 da zercladur 2017

Markus Morgenthaler-Loretz, naschius ils 25 da mars 1959, morts ils 15 da zercladur 2017

Alphons Furger, naschius ils 02 da mars 1924, morts ils 15 da zercladur 2017

Ludwig Jeker, naschius ils 24 da mars 1946, morts ils 02 da fenadur 2017

Giusepa Giger-Fry, naschida ils 16 da december 1926, morta ils 05 d'uost 2017

Naschientschas:

Fatzer Matteo Michael, naschius ils 29 da matg 2017, fegl da Michaela Jonneck e Georg Fatzer  
Flepp Amélie, naschida ils 15 da zercladur 2017, feglia da Flurina Albin e Pascal Flepp  
Keller Arina, naschida ils 29 da zercladur 2017, feglia dad Andrea e Roger Keller  
Urgast Alfred, naschius ils 7 d'uost 2017, fegl da Simona ed Andreas Urgast

**Tractandas:**

1. Protocol 5-2017/2020
2. Center da sport e cultura: Presentaziun dall'evaluaziun dalla HTW Cuera davart las lavurs da planisaziun en connex cun la sanaziun dil CSC
3. Center da sport e cultura: Decisiun da principi pertuccont il glatsch artificial - Credit per la cumpra d'ina maschina d'elavurar il glatsch (messadi nr. 10-2017/2020)
4. Ura da damondas (conform ad art. 44 dil regulativ da fatschentas)

Duront l'emprema ura dalla seduta pren il cussegl da vischnauncas, sut l'egida da gerau Clemens Berther ed il menader dil center Herbert Schmelzer, investa dil Center da sport e cultura.

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



## 1. Protocol

*Protocol nr. 5-2017/2020*

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.

Il protocol vegn **approbaus senza midadas.**

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



## **2. Center da sport e cultura: Presentaziun dall'evaluaziun dalla HTW Cuera davart las lavurs da planisaziun en connex cun la sanaziun dil CSC**

### ***Presentaziun:***

#### Suprastonza:

Gerau Clemens Berther presenta l'evaluaziun dallas lavurs da planisaziun en connex cun la sanaziun dil Center da sport e cultura (CSC) fatgs dalla HTW Cuera.

Suenter ch'il recuors dalla surdada dalla lavur d'architect ei renviaus ha la suprastonza communal e la cummissiun dil CSC surdau las lavurs da sanaziun agl architect per elavurar in concept da sanaziun. Il concept duei cumpigliar la sanaziun dalla caffetaria, dalla halla gronda, dalla halla da tennis, dalla halla da reiver, dalla halla Fontauna, dallas installaziuns sanitaras e d'electricidad.

Dadora: Piazza da glatsch, piazza da balla (illuminaziun), las piazzas da tennis, da giug e da minigolf. Plinavon definir parcadis e signalisaziun.

Plan da termin: Ils 16 d'avrel 2018 duei il concept cun la calculaziun dils cuosts vegnir surdaus alla suprastonza communal.

Da remarcar ei ch'el decuors da 2011 - 2016 ein frs. 2,5 milliuns vegni investai el CSC. Plinavon ha l'evaluaziun dils basegns turistics mussau ch'il sport ei decisivs per la destinaziun Disentis/Mustér.

#### Cussegl:

Ils cussegliers e cusseglieras fan buca diever dil plaid.

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



### **3. Center da sport e cultura: Decisiun da principi pertuccont il glatsch artificial - Credit per la cumpra d'ina maschina d'elavurar il glatsch (messadi nr. 10-2017/2020)**

#### ***Presentaziun:***

Suprastonza:

Gerau Clemens Berther fa menziun che la maschina da glatsch existenta hagi 49 onns e reparaturas segien buca pli pusseivlas da far muort munconza dalla tocca. Per remplazzar quella sto la suprastonza haver il consentiment dil cussegl da vischnaunca da mantener il glatsch el futur ella medema fuorma sco tochen dacheu.

Il glatsch ei in impurtont factur ella purschida per hosps ed indigens. Quei han discuors cun signur Weber ed ils exponents dil Hotel Acla da Fontauna mussau. Per indigens ei il glatsch medemamein d'impurtonza, numnadamein per la giuventetgna e per ils commembers dil Club da curling. La suprastonza propona al cussegl da dir gie al glatsch e da decider da cumprar ina nova maschina d'elavurar il glatsch.

#### ***Discussiun e debatta d'entrada:***

Cussegl:

Il impuls dall'evaluaziun sin pagina 7 ed 8 fussen schanzas impurtontas d'agir. Ei manca denton propostas per caussas novas. Pertgei fan ins buca in pass anavon e va cun ina tenuta innovativa vid la caussa?

L'analisa dalla HTW di buca bia. Da pliras varts han ins spitgau sin caussas novas da quella. Il project fatgs avon 2 onns proponeva interessantas caussas.

Il studi dalla HTW fa surstar e di buca ora bia. Il glatsch sto esser mantenius egl avegnir.

La tuor sil pass dil Gelgia ei in'innovaziun. Quella fuss exempel per las investiziuns previdas el CSC.

Suprastonza:

Gerau Clemens Berther: La finamira dalla sanaziun ei da renovar ils indrezs existents e da procurar da sminuir ni silmeins mantener ils cuosts da menaschi. Sedat ei el project da far enzatgei niev, sto la vischnaunca igl emprem consultar las finanzas. Il concept risguarda tuttas propostas dil studi. Oz vai sulet per la decisiun da menar il glatsch vinavon per saver decider da cumprar la maschina d'elavurar glatsch.

President communal Robert Cajacob: Il turissem generescha 85% dalla valeta dall'economia ella regiun e la Surselva ei ina destinaziun. Mintga liug da quella ha sia purschida da coc. Mustér ha quella el CSC che vegn era sustenius dil cantun. Il CSC ei unics en Surselva, perquei eis ei impurtont da mantener quei che nus havein.

La decisiun dalla tuor vegn fatga en in proxim pass. Oz savein nus buca co il CSC vesa ora egl avegnir. Il glatsch ha denton in'influenza sigl avegnir da quel e cunzun sin la sanaziun dil concept d'energia els stabiliments.

Cussegl:

Ei semeglia sco sch'jeu fagess in sistem da scaldament senza saver co mia casa futura vesa ora.

Dat ei era ina pusseivladad da far umbriva sil glatsch?

Per prender ina decisiun fuss ei d'avantatg dad haver in project cun glatsch ed in senza glatsch.

### Surpastonza:

President communal Robert Cajacob: Il project sedifferenziescha sch'igl architect ha da far quel cun glatsch ni senza glatsch. El sto saver danunder che l'energia da scaldar vegn. Daco far dus projects e caschunar cuosts supplementars? Il cussegl communal duei decider tgei varianta ch'el vul egl avegnir.

Gerau Clemens Berther: Il sistem d'umbriva caschuna cuosts. Cun in tal san ins eventualmein spargnar energia ni prolungir la sesiun da glatsch. Da risguardar ei era il fatg ch'il plaz da ballapei, el qual il glatsch ei integraus vegni buca tangaus da midadas.

### Cussegl:

Il cussegl vul saver co il glatsch vesa ora egl avegnir, stat el sco ussa, dat ei in'otra moda attractiva ed innovativa? Tgei fan ins cun la maschina sch'il glatsch ei buca sco ussa, mobein en in'otra fuorma ni tgei variantas dat ei aunc? Da principi ei la damonda gie ni na al glatsch.

Il sistem da scaldament ei concepìus per 20 onns. Tgei fan ins sch'il glatsch ei buc en 10 onns?

### Suprastonza:

Gerau Clemens Berther: Il glatsch existent funcziunescha. Las maschinas possibiliteschan da mantener il glatsch sco dapresent ed ein buca cheu per scaldar, gliez ei mo in effect secundar. Prioritads da sanaziun han autras caussas. Il glatsch existent ei buns e munta ina buna purschida per hosps ed indigens. Nus essan dil meini da mantener quei ch'ei bien.

President communal Robert Cajacob: Il messadi fa la damonda da cumprar la maschina dad elavurar il glatsch. Ei va per il glatsch existent. Sche nus mantenin el, stuein nus cumprar la maschina.

### Cussegl:

Tgei schabegia sch'il cussegl di na al glatsch? Dat ei in auter sistem che drova 30 ni 40% meins energia en in auter liug?

Il cussegl ha problem cun la successiun. Ei maunca novaziuns, perquei ch'il concept ei buca cumplets sin meisa. Aschia san ins buca co ei fuss cun autras variantas da glatsch.

Cun far vinavon glatsch sco ussa essan nus ligiai ed havein negina flexibilitad a vesta d'in niev project. Duas variantas fussen d'avantatg per decider.

### Suprastonza:

Gerau Clemens Berther: Il glatsch stuein nus menar vinavon tochen la fin dalla sesiun 2018/2019, pertgei ei exista in contract cul Club da curling. Ils indrezs ein pagai, els genereschan energia gratuita. Nus essan aviarts per megliers systems, denton novas investiziuns cuostan. Studis portan buca megliers systems e models. Per il mument vegn cussegliu da mantener igl existent. Vus saveis haver fidonza ella cumissiun dil CSC ed ella suprastonza. La piazza da glatsch sco ella ei oz sa buca vegnir tschentada en in auter liug egl areal dil center.

Gerau Iso Mazetta: Il glatsch ei in sistem relevant ed ha influenza sil project da sanaziun. El porscha pusseivladads multifaras per far events, ils quals ston lu aber vegnir vendi. Novas variantas drovan temps e prolungeschan il temps d'evaluaziun. Igl ei da star vid la damonda tschentada el messadi.

### Cussegl:

Il glatsch savein nus era schar curdar e remplazzar ils ventilaturs cun collecturs da sulegl per far energia. Aschia san ins tener aviert per igl avegnir novas pusseivladads.

Nus cussegliers havein udiu e viu informaziuns sur da studis dad autras purschidas. La suprastonza nova mereta tuttina sustegn e fidonza. Oz ed el proxim avegnir havein nus in glatsch sco el exista. Lein tuttina cumprar quella maschina nova.

Suprastonza:

President communal Robert Cajacob: Sco la discussiun sespleiga stuein nus dalla suprastonza prest tschentar la damonda da confidanza. La damonda el messadi ei tuttina clara. Nus havein fatg quella cun la ponderaziun dil beinstar per la vischnaunca.

Cussegl: Entra ella discussiun en detagl.

La discussiun ha demussau ch'il glatsch sto star ed igl ei da cumprar la maschina.

Ei dat las 2 variantas, cumprar ni fittar. La cumpra ei pli favoreivla.

Cusseglia Livio Zanetti fa la proposta da midar la proposta dalla suprastonza « mantener el futur » cun « mantener ad interim ». La proposta vegn acceptada e la damonda al cussegl secloma sco suonda :

« Center da sport e cultura: Decisiun da principi da mantener ad interim il glatsch artificial  
– Credit per la cumpra d'ina maschina d'elavurar il glatsch. »

**Decisiun:**

***Il cussegl decida: senza cuntervuschs ed abstenziuns.***

- a) Da mantener ad interim el CSC in glatsch artificial, malgrad che quel vegn mai a caschunar gudogn en cassa communal. Igl ei ina purschida en favur da vischinas e vischins sco era da hosps.***
- b) cun 14 encunter 1 vusch: Da conceder in credit da frs. 155'000.— per aquistar la maschina per l'elavuraziun dil glatsch artificial el Center da sport e cultura.***

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff





#### 4. Ura da damondas (conform ad art. 44 dil regulativ da fatschentas)

Cussegl:

Damondas da cusseglier Mario Flepp:

Las rispostas da gerau Iso Mazzetta ein marcadadas cun color:

Dapi igl onn 2008 fa la fatschenta da baghegiar Berther SA adina puspei paleis da vuler construir in baghetg d'economia a Pignola. Bein ina buna causa da vuler scaffir piazzas da lavur a Mustér.

Ils 18 d'avrel 2011 ha la suprastonza communal – sunter che la zona da mistregn Pignola era vegnida approbada – approbau il plan da quartier Pignola per possibilitar all'interpresa Berther SA la construcziun d'in grond menaschi da mistregn sin la parcella 189.

Dapi il conclus dalla Regenza grischuna dils 5 da fenadur 2016 – concernent l'approbaziun dalla revisiun parziala dalla planisaziun locala – eis ei definitivamein enconuschent, che las parcelas vischinontas el vest dalla Via Foppas (Marias) san vegnir surbaghegiadas pér cura che la zona da mistregn a Pignola ei baghegiada. Gia cun l'introducziun dalla revisiun parziala dalla planisaziun locala igl onn 2014 eis ei adina puspei vegniu fatg attents l'interpresa Berther Holding AG sin quella problematica.

Ils 23 da december 2016 ha la Berther Holding AG inoltrau la damonda da baghegiar.

La procedura da baghegiar ei per suandonts motivs vegnida sistida:

- igl object survarga il cunfin dalla parcella 189  
Il project survarga il cunfin dalla parcella 189 e tanghescha la parcella 188 en possess d'in tierz proprietari.
- il perimeter da surbaghegiada definius el plan da quartier Pignola vegn buca observaus  
Il spazis da surbaghegiada definius tenor plan da quartier Pignola vegn buca observaus. Quei plan da quartier ei vegnius elaboraus en stretga collaboraziun cun l'interpresa da baghegiar Berther Bau- und Industrie AG e silsuneter approbaus dalla suprastonza communal ils 18 da november 2011.

Ils 30 da zercladur ei vegniu communicau el fegl ufficial:

« l'intenziun d'introducir la procedura per il plan da quartier e pil regruppament da terren cun abolir il medem mument il plan da quartier dils 18 d'avrel 2011 »

Jeu tschentel a mi las suandontas damondas:

- Eis ei da quintar che la Berther Holding AG tila alla liunga il project sco entochen dacheu?  
La suprastonza communal ei dall'opiniun ch'ina interpresa da baghegiar inolteschi in project per ina damonda da baghegiar cugl intent da realisar quel. Problem en quei cass ei ch'il project ademplescha buca las prescripziuns da baghegiar ed era buca quellas definidas el plan da quartier. Perquei ston las premissas planisatorias vegnir scaffidas per che quei project sco quei che quel ei vegnius inoltraus ed exponius sappi vegnir lubius. Igl ei buca exlaus che la publicaziun cun l'exposiziun ston vegnir repeti en connex cun la midada dil plan da quartier.

Sco exempel:

In privat fa la damonda da baghegiar per ina casa da pliras famiglias cun 4 alzadas en ina zona da baghegiar H1 per duas alzadas. Vinavon preveda il project aunc terren dalla parcella vischinonta, ch'ei en possess d'in tierz. Il project survarga la basa legala

(dimensiuns e cunfins) per lubir quel. Medemein duess igl access per il vischin succeder sur la parzella en planisaziun. Per saver lubir aschia in object en quella zona basegna ei

ina midada dalla zona da baghegiar (votaziun dil pievel) ed ina midada da maun per la part sin la parzella vischinonta.

- Ei cheu davos ina strategia?

Tgei che l'interpresa persequitescha cun quei project sto ella risponder. La suprastonza communal sa mo decider sin fundament dils fatgs. Fatg ei ch'il project inoltrau ei buca conforms allas prescripziuns dil plan da quartier e che la suprastonza communal vul el rom d'ina planisaziun da quartier adattar las prescripziuns dil plan da quartier.

Plinavon vegn ei ad esser necessari da reveder la planisaziun locala el sectur dalla parzella 188. Tenor conclus dalla Regenza ei quell'enonaziun reservada per la Rhomberg Sersa AG. Realisescha quell'interpresa buca in project, croda quella parzella automaticamein ella zona agricola.

Ulteriuramein eis ei da reveder il plan general d'avertura. Perquei ch'il project dalla Berther Holding AG impedess la colligiaziun dalla parzella 188 cul binari dalla Viafier MGB. Ulteriuramein eis ei el medem mument da sclarir l'avertura/colligiaziun dalla parzella 188 cun la Via Foppas. Pretensiun da segirtad concernent la vosta sin la via.

- Jeu sedamondel sche la Berther Holding AG vul in summa baghegiar? Jeu hai cheu mess dubis.

Suandontas damondas fetschel jeu alla suprastonza:

- Tgei ein il proxims pass, che vegnan fatgs?  
Revisiun parziala dalla planisaziun locala e midada dil plan da quartier. La procedura pil plan da quartier ei instradada. Igl uffeci pil svilup dil territori ha signalisau beinvuglientscha concernent ina revisiun parziala dalla planisaziun locala.
- Con ditg eis ei da quintar che quella procedura cuozza?  
Actualmein se presenta la situaziun aschia, che quella procedura sa vegnir serrada giu el decours dil unviern 2018. Quei basegna denton che la procedura succedi senza ch'ei vegni inoltrau protestas. Aschinavon ch'ei vegness inoltrau protestas, eis ei buca pusseivel d'indicar con ditg che quei sa cuzzar 1 entochen 5 onns.
- Vegn ei dau avon alla Berther Holding AG in termin, sin cura ch'ei sto vegnir entschiet cun la construcziun dil baghetg d'economia?  
Senza reveder la planisaziun locala ed il plan da quartier sa la vischnaunca buca dar in termin per realisar il project. El rom dalla revisiun dalla planisaziun locala fuss ei pusseivel da definir termins da realisaziun.
- Con temps vegn dau persuerter?  
Negina risposta.
- Duess quei termin buca vegnir tenius en, tgei schabegia lu?  
Sa pil mument buca vegnir rispundiu.
- Han ils auters interessents lu la pusseivladad da construir lur baghetgs d'economia?  
Actualmein dependa tut dil plan da quartier sco era dalla revisiun parziala dalla planisaziun locala. Ferton che la firma Berther ha cul project bloccau sesezza vegnan medemamein ils ulteriurs interessents bloccai entras quei agir. La vischnaunca savess era snegar la damonda da baghegiar dalla firma Berther, perquei ch'ella ademplescha buca las prescripziuns da baghegiar. Denton gida quei pauc sche la firma Berther metta buca a disposiziun il terren per autras interpresas. L'interpresa ha era renviu la proposta da vender il terren dalla parzella 189 alla vischnaunca.
- Tgi surpren tut ils cuosts che crodan en connex cun tut las midadas che ston vegnir fatgas ?  
Ils cuosts per la revisiun dalla planisaziun locala surpren il maun public per regla. Ils cuosts per la procedura dil plan da quartier san vegnir adossai als proprietaris da terren.

Nus stuein esser pertscharts che tut ils auters interessents han buca interess da spitgar aschi ditg sco tochen dacheu sin ina clara decisiun.

Damondas da cusseglier Wendelin Jacomet:

1. Tabla da reclama sut halla Cons.

Avon ca. 2 onns havevel jeu tschentau la damonda alla suprastonza communal sch'ei savess buca vegnir midau ora la tabla da reclama sut la halla Cons. Sin quella tabla ein uniuns e societads numnadas ch'existan gia dapi numerus onns buc. Sin quella tabla san ins buca far diever da stitgettas, mo vesamein cun clamras san ins placatar. Ei ha giu num ch'il cau digl uffeci da baghegiar hagi priu si quella incarica. Entochen oz eis ei schabegiau nuot en caussa. Eis ei pusseivel da far quella midada da quella tabla el proxim temps?

Igl uffeci da baghegiar ei aunc lundervi da meglierar la situaziun malcuntenteivla dalla tabla da reclama sut halla Cons. Muort il grond pensum da lavur dil menader digl uffeci da baghegiar ei quella pendenza s'entardada.

2. Appel da risguardar ils dis da ruaus publics.

Questa stad, il fenadaur, ha la suprastonza communal stuiu far in appel pertuccont il risguard dils dis da ruaus publics en nossa vischnaunca. Ei fa surstar mei ch'ei dat schizun commembers dil cussegl da vischnaunca che setegnan buca vid las leschas che nus havein enzacu inaga approbau. Nus che havein dad ira ordavon cun in bien exempel. Ord quei motiv engraziel jeu alla suprastonza communal per siu appel e supplicheschel ella da far quella pubicaziun annualmein, pliras gadas naven dil meins matg el Fegl ufficial dalla Surselva. (Analog igl appel el Fegl ufficial dalla Surselva allas prescripziuns pertuccont igl encurir bulius)

Ei vegn priu enconuschientscha da quei giavisch e sclariu intern cun l'administraziun communal sur digl agir.

3. Sedrun Mustér Turissem (SMT)

“Il maun dretg sa magari buca tgei ch'il seniester fa”

Quei ei stau la lingia grassa ella Quotidiana dils 10 d'october 2016. En quei artechel eis ei vegniu tschentau la suandonta damonda: Co vinavon cun SMT?

La risposta dada dil president da SMT ei stada, che l'uniun duei vegnir sligiada e midada en ina societad acziunara. A caschun dalla proxima radunonza generala da l'auter onn (pia uonn el decuors d'igl atun) vegn ei informau pli detegliadamein davart quella midada ed igl intent da quella. Plinavon duei la radunonza decider, schebein l'uniun vegni sligiada. Ins ha dapi lu mai udiu sch'ei va propi en quella direcziun.

San ins oz gia dir con lunsch ch'ins ei cun quella fatschenta?

Pil mument ei quella damonda spustada.

(Sche la fatschenta ha buca dad esser aschi lunsch) Tgei ein lu ils motivs per quei retard?

Jeu sundel spanegiaus co il protocol dalla SMT sepresenta quella gada.

Il mument vegn menau discuors cun ils representants dallas Pendicularas Andermatt-Sedrun sco era Disentis/Mustér e las treis vischnauncas pertuccont ina collaboraziun sil sector da marketing. Buca clar ei cunzun la situaziun dalla vischnaunca dad Andermatt ord motivs dalla lescha da turissem vertenta el cantun Uri. Ei quella damonda sligiada, vegn ins a mirar vinavon en tgei fuorma che l'uniun SMT vegn menada el futur.

4. Scola Segnas

Il davos temps eis ei vegniu fatg pliras (novas) investiziuns vid la casa da scola a Segnas.

Da tgei summa discurrin nus cheu? Nua vegn quella summa a figurar el quen?

Las investiziuns vegnan fatgas el rom dil manteniment dil baghetg da scola sco era dil manteniment da vias, plazs. Aschia duess esser enconuschent sut tgei conto che quei vegn cudischau. La summa sa vegnir prida ord il quen annual 2017, damai che quella ei buca gest enconuschenta.

Gerau Clemens Berther orientescha davart il stan actual dallas lavurs da rumir ils pégnis taccai dil bau-scorsa:

3'500 m<sup>3</sup> lenna ein gia luvrai si e transportai ord igl uaul  
340 m<sup>3</sup> lenna ein semtgai per sgular cul helicopter  
450 m<sup>3</sup> (schazetg) lenna taccada dil bau-scorsa ein aunc da derscher

Luvrar si la lenna cuosta biebein frs 150.--/m<sup>3</sup>  
Vendita da lenna porta frs. 60.--/m<sup>3</sup>  
Subvenziuns survegn la vischnaunca da cantun e confederaziun denter frs. 80.-- e frs. 90.--/m<sup>3</sup>.

La lenna vegn vendida ella Valtellina ed ell'Austria, la lenna da brisch resta ella regiun. Igl ei da quintar cun ulteriura lenna taccada dil bau quest atun.

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff

Disentis/Mustér, ils 4 da settember 2017